

## I - ARABAKO BATZAR NAGUSIAK ETA ARABAKO LURRALDE HISTORIKOAREN FORU ADMINISTRAZIOA

Arabako Foru Aldundia

### OGASUN, FINANTZA ETA AURREKONTU SAILA

**Foru Gobernu Kontseiluaren 17/2023 Foru Dekretua, maiatzaren 9koa. Onestea Pertsona Fisikoen Errentaren gaineko Zergaren Arautegia onetsi zuen Kontseiluaren abuztuaren 1eko 40/2014 Foru Dekretuaren aldaketa**

Pertsona Fisikoen Errentaren gaineko Zergari buruzko azaroaren 27ko 33/2013 Foru Arauan egin diren aldaketen ondorioz, zerga horren arautegi bidezko garapena eguneratu behar da.

Horregatik, foru dekretu honen xedea da Pertsona Fisikoen Errentaren gaineko Zergaren Arautegia aldatzea, hura eguneratzeko.

Hartutako neurrien artean, lekualdatutako langileentzako araubide bereziari dagokionez, haren edukia zergaren foru arauan araututakora egokitzen da, araubide berezia aplikatzearen aldeko aukera arautzen da, eta ezartzen da hura aplikatzea erabakitzen duten zergadunek atxikitzen behartuta dagoen pertsona edo erakundeari eskatu ahal izango diotela lan etekinen gainean egin beharreko atxikipen tasaren gaineko ehuneko 30eko murrizketa aplikatzeko.

Zilarrezko ekonomiarekin lotutako mikroenpresetan eta enpresa txiki eta ertainetan inbertitzearen kenkariaren eremuan, artikuluko berri bat sartzen da erakunde horiek bete behar duten helburu soziala mugatzeko, zilarrezko ekonomiaren sektorearekin zuzenean lotuta egon daitezen, aurreikusitako kenkaria aplikatzearen ondorioetarako.

Bestalde, arau erreferentziak eguneratzen dira eta aldaketa tekniko batzuk sartzen dira.

Araudi honek proportzionaltasun printzipioa betetzen du, eta xedapen honekin bete nahi den beharrari erantzuteko ezinbestekoak diren arauak biltzen ditu. Ez dago xede horretarako beste neurririk, hartzaileen eskubideak gutxiago murrizten dituenik edo hartzaileei betebeharrak gutxiago jartzen dizkienik.

Ekimen honen bidez segurtasun juridikoaren printzipioa bermatzen da, eta koherentea da estatuko eta Europar Batasuneko gainerako ordenamendu juridikoarekin.

Foru dekretu hau izapidetzean gardentasun irizpideari jarraitu zaio, zeina Administrazio Publikoaren Administrazio Prozedura Erkidearen urriaren 1eko 39/2015 Legearen 129. artikuluko arautzen baitu.

Ikusirik gaiari buruz Zerga Araudiaren Zerbitzuak emandako arau eraginari buruzko txosten laburtua eta aholku batzordeak emandakoa, zeinean lege antolamenduari egokitzat jotzen baita foru dekretua.

Horregatik, Ogasun, Finantza eta Aurrekontu Saileko foru diputatuak proposatuta, eta Foru Gobernuaren Kontseiluak gaur egindako bilkuran gaia aztertu ondoren,

## XEDATZEN DUT

**Artikulu bakarra. Abuztuaren 1eko 40/2014 Foru Dekretua aldatzea, Pertsona Fisikoen Errentaren gaineko Zergaren Arautegia onesten duena**

Honako aldaketa hauek egiten dira Pertsona Fisikoen Errentaren gaineko Zergaren Arautegia onesten duen abuztuaren 1eko 40/2014 Foru Dekretuan:

Bat. Berriro zenbakitzen dira 1. artikuluko egungo 2. eta 3. apartatuak, eta 3. eta 4. apartatu bihurtu, hurrenez hurren. 1. artikuluari 2. apartatu berria gehitzen zaio, eta honela idatzita geratzen da:

“2. Titulu honetan aipatzen den araubide berezia aplikatzeko, zergadunek beren lan denboraren ehuneko 85, gutxienez, honako jarduera hauetako batean edo batzuetan aritu beharko dute:

- a) Ikerketa eta garapena.
- b) Jarduera zientifikoak eta teknikoak.
- c) Finantza arloko jarduerak.
- d) Jarduera komertzialak.”

Bi. Beste paragrafo bat gehitzen da 1. artikuluan berriz zenbakitu den 3. apartatuaren c) letraren amaieran, eta honela idatzita geratzen da:

“1. titulu honetan aipatzen den araubide berezia aplikatzeko, beharrezkoa da aipatutako jasangarritasun txostena edo kudeaketa ez-finantzarioaren egoera argitaratzea zergadunak araubide berezi hori aukeratzeko duen zergaldi bakoitzean.”

Hiru. 2. artikulua, zeinak egun ez baitauka edukirik, honela idatzita geratzen da:

**“2. artikulua. Lekualdatutako langileei araubide berezia aplikatzeko eskubidea egiaztatzea**

1. Titulu honetan aipatzen den araubide berezia aplikatzea erabakitzen den autolikidazioarekin batera, honako agiri hauek aurkeztu beharko dira:

a) Pertsona edo erakunde enplegatzaile batekin lan harreman arrunt, berezi edo estatutu harremanak hasi badira Espainian, aurreko artikuluan xedatutakoak betez, hark emandako frogagiria, zergadunarekiko lan edo estatutu harremanak aitortzen dituena, lana Espainian egingo dela egiaztatzen duena eta datu hauek zehazten dituena: noiz ekin zaion jarduerari (Espainiako Gizarte Segurantzaren altan ezarritako data), zein den lan zentroa eta non dagoen, eta lan kontratuaren iraupena.

b) Lekualdatzea pertsona edo erakunde enplegatzaileak agindu badu Espainiako egoiliar den enpresa edo erakunde bati edo Espainian dagoen establezimendu iraunkor bati zerbitzuak egiteko, horrek zerbitzugintza aitortzeko emandako frogagiria, zerbitzu horiek eskaintzean, aurreko artikuluan xedatutakoak betez. Frogagiri horrekin batera pertsona edo erakunde enplegatzailearen lekualdatze gutunaren kopia aurkeztuko da, eta bertan, aurreko aitortpenaz batera jarduerari noiz ekin zaion (data hau Espainiako Gizarte Segurantzaren altan edo, bestela, jatorrizko gizarte segurantzaren legeriarekin jarraitzea ahalbidetzen duen dokumentazioan ageri da), lan zentroa zein den eta non dagoen eta lekualdatzeak zenbat iraungo duen zehaztuko da, eta lana Espainian egingo dela egiaztatu.

2. Aurreko b) letran jasoriko kasuan, jatorrizko gizarte segurantzaren legeriari eusten bazaio, egiaztatu beharko da langilearen lanbide kategoria Gizarte Segurantzaren Araubide Orokorreko 1. kotizazio taldekoen baliokidea dela.

3. Artikulu honetan xedatutakoaren ondorioetarako, zergaduna Espainiako lurraldean noiz sartu den adierazi beharko da beti.

4. Aurreko 1. apartatuan ezarritakoa gorabehera, zergadunak egiaztatu ahal izango du lekualdatutako langileei araubide berezi hau aplikatzeko eskubidea duela zuzenbidean onartutako beste edozein frogabideren bidez.”

Lau. 3. artikulua, zeinak egun ez baitauka edukirik, honela idatzita geratzen da:

### “3. artikulua. Araubide berezia hautatzea

Egoitza 2022ko urtarrilaren 1etik aurrera Espainiako lurraldera aldatzen duten zergadunek aukera izango dute Zergaren Foru Arauaren 56 bis artikuluan aipatzen den lekualdatutako langileentzako araubide berezia aplikatzeko, 1. apartatuan aipatzen diren zergaldietako edozeinetan.

Hala ere, egoitza Espainiako lurraldera aldatzen duten urtean araubide berezia aplikatzea erabakitzen ez duten baina ondoren egiten duten zergadunek araubide berezia aplikatu ahal izango dute soilik Espainiako lurraldera egoitza aldatu zuten urtearen, hau da araubide berezia aplikatzeko gaitu zituen urtearen, ondorengo 10 zergaldien epea osatu arte geratzen diren zergaldietan.

Artikulu honen lehen paragrafoan eta Zergaren Foru Arauaren 105. artikuluan xedatutakoaren ondorioetarako, zergaduna lekualdatutako araubide berezia aplikatzeko aukeraz baliatuko da hura aplikatu nahi duen zergaldi bakoitzeko autolikidazioa aurkeztean; edonola ere, arautegi honen 74. artikuluan ezarritakoa beteko da.”

Bost. Ezabatu egiten da 8 bis artikulua.

Sei. Aldatu egiten da 11. artikuluko 4. apartatua, eta honela idatzita geratzen da:

“4. Zergadunak bi hauen artean hautatuko du: salbuespen hori aplikatzearen eta aplikatu nahi den ekitaldiko autolikidazioa aurkeztean dauden soberakinen araubidea aplikatzearen artean. Zergaldi baterako hautatzen den modalitatea zergaren autolikidazioa nork bere borondatez aurkezteko epealdia amaitutakoan aldatu ahalko da, baldin eta Zerga Administrazioak errekerimendurik egiten ez badu.”

Zazpi. Aldatu egiten dira 12. artikuluko 1. apartatuaren e), i), l), m), n) eta o) letrak, eta honela idatzita geratzen dira:

“e) Eusko Jaurjaritzaren 164/2019 Dekretua, urriaren 22koa, familia bizitza eta lana bateratzeko laguntzei buruzkoa.”

“i) Lurralde Plangintza, Etxebizitza eta Garraio sailburuaren Agindua, 2021eko uztailaren 21ekoa, etxebizitzak eta eraikinak birgaitzearen, irisgarritasunaren eta energia efizientziaren arloko jarduketara babestuetarako finantza neurriei buruzkoa.”

“l) 39/2021 Foru Dekretua, abuztuaren 3koa, onespina ematen diena AP-1 eta AP-68 autobideetan diruz laguntzekoak diren tartekak erabiltzeagatik bidesaria ordaintzen duten pertsona fisikoentzako dirulaguntzen oinarri arauai.”

“m) Arabako Bideak sozietate publikoak eskainitako laguntzak, Arabako Lurralde Historikoan bizi diren AP-1 eta AP-68 autobideen erabiltzaileek Arabako tartean ordaindutako bidesaria diruz laguntzeko programarekin bat etorritz. Ekainaren 12ko 318/2018 Erabakiaren bidez eman ziztaion ardura hori sozietate publikoari.”

“n) 39/2014 Foru Dekretua, abuztuaren 1ekoa, arautzen dituena autonomiaren aldeko eta mendekotasunari arreta eskaintzeko sistemako prestazio ekonomikoak Araban: mendekoak familia barruan zaintzeko eta zaintzaile ez profesionaleri laguntzeko prestazio ekonomikoa, laguntza pertsonalaren prestazio ekonomikoa eta zerbitzuari lotutako prestazio ekonomikoa.”

“o) 32/2021 Foru Dekretua, uztailaren 20koa. Onespina ematea desgaitasuna duten pertsonen eta garapen nahasmenduak dituzten 0 eta 6 urte bitarteko adingabeen autonomia bultzatzeko banakako laguntzak arautzeko oinarri orokorrei.”

Zortzi. Aldatu egiten da 14. artikuluko 1. apartatuaren lehenengo paragrafoa, eta honela idatzita geratzen da:

“1. Zergaren Foru Arauaren 19. artikuluko 2. apartatuaren a) letran ezarritako ehuneko 50eko integrazio ehuneko aplikatzeko, denboran zehar modu nabarmen irregularrean lortutako lanaren etekintzat ondoren adieraziko direnak soilik hartuko dira, zergaldi bakarrean egotziz gero:”

Bederatzi. Ezabatu egiten da 14. artikuluko 4. apartatua.

Hamar. Aldatu egiten dira 17. artikulua eta lehenengo paragrafoa, eta honela idatzita geratzen dira:

**“17. artikulua. Akzioen gaineko aukerak: integrazio ehunekoak aplikatzeko berariazko muga**

Zergaren Foru Arauaren 19. artikuluko 2. apartatuaren a) letraren hirugarren paragrafoan jasotako mugaz gain, zergaren foru arauaren 20. artikuluko 1. apartatuan aipatutako akzioen gaineko aukera eskubidea baliatuz lanaren etekinak sortzen badira, ehuneko 60 edo 50eko integrazio ehuneko ez zaie aplikatuko 20.000 euroren eta etekina sortu den epealdiko urteen kopuruaren biderketaren emaitza gainditzen duen etekin kopuruari.”

Hamaika. Aldatu egiten da 18. artikuluko 2. apartatuaren azkeneneko paragrafoa, eta honela idatzita geratzen da:

“Apartatu honen 1., 3. eta 4. puntuetan xedatutakoa ez zaie aplikatuko autoei eta haien atoei, ziklomotorrei eta motozikletei, zeinak Zergaren Foru Arauaren 27. artikulua 5. erregelak xedatutako baititu. Era berean, puntu horiek ez zaizkie aplikatuko ez aisialdiko ez ur kiroletako ontzi eta itsasontzietan zein aireontzietan, zeinak zergaren foru arauaren 27. artikuluko 6. erregelak araututako baititu.”

Hamabi. Bigarren paragrafoa gehitzen zaio 25. artikuluko 2. apartatuari, eta honela idatzita geratzen da:

“Aurreko paragrafoan jasotako kasuan, eta bateriadun ibilgailu elektrikoak (BEV) edo bateria hedatutako ibilgailu elektrikoak (E-REV) badira, aurreko apartatutako ehunekoak ehuneko 100era igotzeko dira, eta osorik aplikatuko dira baldin eta eskuratze prezioa 35.000 eurokoa edo txikiagoa bada; bestela, 35.000 euroren edo eskuratze prezioaren proportzioan.”

Hamahiru. Aldatu egiten da 33. artikuluko 1. apartatuaren c) letra, eta honela idatzita geratzen da:

“c) Aurreko b) letran xedatu denaren ondoriozko kopuruari ehuneko 35 kenduko zaio kontzeptu hauengatik: amortizazioa, narriadura galerak, errentamendu gastuak, zergaren foru arauaren 27. artikuluko 5. erregelako Bi apartatuaren a) letran eta Hiru apartatuaren a) letran aipatzen diren lagapena edo balio galera, eta justifikatzen zailak diren gastuak.”

Hamalau. Aldatu egiten da 49. artikuluko 5. apartatua, eta honela idatzita geratzen da:

“5. Zergadun batek zergadun izateari uzten badio egoitza atzerrira aldatzeagatik, zergaren foru arauaren 57. artikuluko 3. apartatuan jasotakoarekin bat etorritik, egotzi gabeko errenta guztiak aitortu beharreko azken zergaldiari dagokion zerga oinarrian integratu behar dira eta, bidezkoa izanez gero, autolikidazio osagarria egin behar da egoitza aldatzeagatik zergadun izateari uzten dionetik hiru hilabete igaro baino lehen, zehapenik, berandutze korriturik eta errekar gururik gabe.

Hori guztia zergaren foru arauaren 57. artikuluko 3. apartatuaren bigarren paragrafoan xedatutako kasuetan ezarritako aukeraz baliatzearen kaltetan izan gabe.”

Hamabost. Aldatu egiten da 50. artikuluko 2. apartatuaren 1. zenbakia, eta honela idatzita geratzen da:

“1. Zeharkako formularen zenbatekoa ezin da izan 11 euro egunean baino gehiago. Eguneko zenbatekoa hori baino gehiago bada, soberakina gauzazko ordainsari izango da. foru aldundiak zenbatekoa alda dezake.”

Hamasei. Aldatu egiten da 52. artikulua, eta honela idatzita geratzen da:

**“52. artikulua. Langileak eguneratzeko, gaitzeko eta birziklatzeko kopuruak**

Zergaren foru arauaren 17. artikuluko 2. apartatuaren c) letran ezarritakoari dagokionez, ikasketak ez dira gauzazko ordainsarizat hartuko, baldin eta ikasketok xedatzen badituzte pertsona edo erakunde enplegatzaileek, eta haiek zuzenean edo zeharka finantzatzen badituzte, langileak eguneratu, gaitu edota birziklatzeko. Horrezaz gain, ikasketok nahitaezkoak izango dira jarduerak egiteko edo lanpostuen ezaugarriengatik, eta hori hala izango da lana benetan beste pertsona edo erakunde espezializatu batzuek egiten badute ere. Kasu horietan, joan-etorri, mantenu eta egonaldi gastuetarako kopuruei dagokienez arautegi honen 13. artikuluan xedatutakoa izango da aginduzkoa.

Aurreko paragrafoan xedatutakoaren ondorioetarako, ulertuko da ikasketak pertsona edo erakunde enplegatzaileak xedatu eta zeharka finantzatu dituela, baldin eta beste pertsona edo erakunde batzuek finantzatzen badituzte eta haiek produktu jakin batzuk merkaturatzen badituzte, eta hartarako beharrezkoa bada langileak prestakuntza egokia izatea, eta, betiere pertsona edo erakunde enplegatzaileak partaidetza hori baimentzen badu.”

Hamazazpi. Aldatu egiten dira 60. artikuluko 1. apartatuaren lehenengo paragrafoa eta 2. apartatuaren lehenengo paragrafoa, eta honela idatzita geratzen dira:

“1. Zergaren foru arauaren 23. eta 82. artikuluetan aipatutako desgaitasuna zuzenbidean onartutako frogabideetako baten bitartez egiazta daiteke.”

“2. Zergaren foru arauaren 82. artikuluan aipatzen den mendekotasun egoeran egongo dira otsailaren 11ko 174/2011 Errege Dekretuan onartutako mendetasun egoeran daudenak, zeinaren bidez onesten baita autonomia pertsonala sustatzeko eta mendekotasun egoeran bizi diren pertsonen laguntzeko abenduaren 14ko 39/2006 Legeak ezarritako mendekotasun egoeraren balorazio baremoa.”

Hemezortzi. Aldatu egiten da 61. artikuluko 1. apartatua, eta honela idatzita geratzen da:

“1. Oro har, ohiko etxebizitza da zergadunak hiru urtean segidan, gutxienez, bizilekutat daukan eraikina.

Hala ere, etxebizitza ohikoa izan dela joko da epealdi hori igaro ez arren, zergaduna hiltzen denean, edo ezinbestez etxebizitzaz aldatzera behartzen duten beste inguruabar batzuk gertatzen direnean, hala nola: etxebizitza ez egokitzea zergadunaren edo harekin bizi den ondorengo edo aurreko ahaidearen, ezkontidearen edo izatezko bikote lagunaren desgaitasun mailara edo zergaren kuota osoan kenkaria egiteko eskubidea ematen duen pertsonarenera; ezkontzea, senar-emazteak banantzea edo izatezko bikotea desegitea; lantokia aldatzea; lehen enplegua edo beste bat lortzea; etxebizitza aipatutako epean ordaintzea eragozten duten inguruabar ekonomikoak, edo antzeko beste inguruabar justifikaturen bat.

4. apartatuan xedatutakoa alde batera utzi gabe, ohiko etxebizitzaren izaera izan duen etxebizitzak izaera hori galduko du zergadunak bertan bizitzeari uzten dion unetik aurrera.

Ez dira sartuko ohiko etxebizitzaren kontzeptuan ez lorategiak, ez parkeak, ez igerilekuak, ez kirol instalazioak, ez garajeak, ez eta, oro har, berez etxebizitza ez diren eranskinak ez beste edozein elementu ere, salbu eta elementu horiek erregistroko finka bakarria osatzen badute etxebizitzarekin.

Baldin eta familia unitateko kideak hiri ondasun higiezin bat baino gehiagoren titularrak badira, ondasunetako bat bakarrik izango da ohiko etxebizitza. Horri dagokionez, ohiko etxebizitzat joko da familia unitatearen bizi interesen, eta giza, gizarte eta ekonomiaren aldetiko harremanen berebiziko gunea dena.”

Hemeretzi. Aldatu egiten da 62. artikuluko 1. apartatua, eta honela idatzita geratzen da:

“1. Ohiko etxebizitzaren eskuraketarekin berdintsiko dira kasu hauek:

a) Etxebizitza zabaltzea, baldin eta eremu irekia itxiz edo beste edozein bideren bitartez era etengabea eta urtaro guztietan zehar azalera bizigaia handitzen bada.

b) Eraikuntza lanak, zergadunak zuzenean ordaintzen baditu obrak egitearen ondoriozko gastuak, edo obren sustatzaileari konturako kopuruak ematen badizkio, betiere obra horiek, gehienez, lau urteko epean amaitzen direnean, inbertsioa hasten denetik zenbatuta.

c) Higiezinaren azalerako eskubidea eskuratzea, baldin eta ohiko etxebizitza izango bada eta hura titulartasun publikoko lurzoru baten gainean eratu bada.”

Hogei. 62. artikuluari 6. apartatu berria gehitzen zaio, eta honela idatzita geratzen da:

“6. Zergaren foru arauaren 87. artikuluko 5. apartatuaren c) letran xedatutakoaren ondorio-  
etarako, egokitzen obrak eta instalazioak beharrezkoak direla ziurtatu beharko du arautegi honen  
60. artikuluko 1. apartatuaren a) letran aipatzen diren organoetako batek, desgaitasunen bat  
duten edo mendekotasun egoeran dauden pertsonen moldaera duina eta egokia erraztuko duen  
irisgarritasunerako eta komunikazio sentsorialerako.”

Hogeita bat. Aldatu egiten da 65. artikuluko 1. apartatuaren bigarren paragrafoa, eta honela idatzita geratzen da:

“Zergadunak kentzen dituen kopuru horiek zergaren foru arauaren 87. artikuluan aipatzen den 36.000 euroko kopurutik kenduko dira. Halaber, zergaren foru arauan eta arautegi honetan ezarritako gainerako baldintzak eta mugak ere aplikatuko dira.”

Hogeita bi. 66 bis artikulua berria gehitzen da V. tituluko III. kapituluan, eta honela idatzita geratzen da:

**“66 bis artikulua. Zilarrezko ekonomiari lotutako mikroenpresa edo enpresa txiki edo ertai-  
netan inbertitzearen kenkaria**

1. Zergaren foru arauaren 90. artikuluko 2. apartatuaren b) letran xedatutakoaren ondorio-  
etarako, ulertuko da erakunde baten helburu soziala zuzenean lotuta dagoela zilarrezko ekono-  
miaren sektorearekin, baldin eta zuzenean bideratuta badago adinekoen berriazko premietara  
egokitutako ondasunak eta zerbitzuak diseinatzera, ekoiztera eta/edo hornitzera, eta, bereziki,  
arlo horien barruan, honako gai hauetara: osasuna eta zaintzak, komunikazioa, ekonomia eta  
finantza aholkularitza, talentua prestatzea eta aprobetxatzea, aisia eta entretenimendua, segur-  
tasuna, garraioa eta etxebizitza.

Aurreko paragrafoan aipatutako zuzeneko lotura egon dadin, adinekoen berriazko pre-  
mietara egokitutako ondasunen eta zerbitzuen diseinutik, ekoizpenetik eta/edo horniduratik  
datorren diru sarreren bolumena erakundearen guztizko diru sarreren bolumenaren ehuneko 50  
izan beharko da gutxienez.

Aurreko paragrafoan aipatzen den baldintza Zergaren Foru Arauaren 90. artikuluan jasoriko  
kenkaria aplikatzeko eskubidea ematen duten akzioak edo partaidetzak eskuratzen diren zergal-  
dian bete beharko da, eta, gutxienez, hurrengo 5 zergaldietan.

2. Bat etorri Zergaren Foru Arauaren 90. artikuluko 6. apartatuan jasotakoarekin, erakundeak  
eman behar duen ziurtagirian, zeinaren akzioak edo partaidetzak eskatutako baldintzak beteta  
eskuratu direla adierazi behar baita, zehaztu beharko da aurreko apartatuan ezartzen diren ar-  
loetatik zeinetara zuzenduta dagoen erakundearen helburu soziala.”

Hogeita hiru. Aldatu egiten da 74. artikuluko 1. apartatua, eta honela idatzita geratzen da:

“1. Zergaren foru arauaren 105. artikuluan xedatutakorako, zergadunek arau horretan xedatutako aukeraz baliatuko dira eragina izan behar duten zergaldiko autolikidazioa aurkeztean, eta aldatu egin ahal izango dira, behin zergaren aitortpena egiteko borondatezko epea amaitu ondoren, eta Zerga Administrazioak lehenago ez badu eskakizun bat egin.”

Hogeita lau. Aldatu egiten dira 83. artikuluko 2. apartatua eta 4. apartatuaren azken aurreko paragrafoa, eta 5. apartatu berria gehitzen zaio artikuluko horri; honela idatzita geratuko dira:

“2. Aurreko apartatuan xedatutakoaren ondorioetarako, lanaren errenta jakin batzuei zergaren foru arauaren 19. edo 20. artikuluetan edo hogeita batgarren xedapen gehigarrian aipatutako ehunekoak aplikatu behar bazaizkie, errenta horien zenbateko osoa kalkulatzeko aipatutako ehuneko horiek erabiliko dira.”

“Halaber, ez dira atxikipen oinarrian sartuko langile autonomoen araubide bereziko Gizarte Segurantzako kotizazioen kontzeptuan kooperatibek, arau xedapenak betez, bazkide langileen edo lan bazkideen gizarte eta laguntza estaldurarako ordaintzen dituzten zenbatekoak, ezta Gizarte Segurantzarekin elkarlanean diharduten mutuek aldi baterako ezintasuneko egoeran dauden langile autonomoei dagokienez ordaintzen dituztenak ere.”

“5. Halaber, zergaren foru arauaren 56 bis artikuluan xedatutakoa aplikatzea erabakitzen duten zergadunek atxikipena egin behar duen pertsonari edo erakundeari eskatu ahal izango diote arautegi honen 83. artikuluko 1. apartatuaren a) letran xedatutakoa aplikatzeko, kasuan kasuko atxikipen tasaren gainean ehuneko 30eko murrizketa aplikatuta.”

Hogeita bost. Aldatu egiten dira 84. artikuluko 2. apartatuaren 2. erregelaren azkeneko paragrafoa eta 3. erregelaren lehenengo paragrafoa, eta honela idatzita geratzen dira:

“Ordainsari horietarikoren bati zergaren foru arauaren 19. edo 20. artikuluetako eta hogeita batgarren xedapen gehigarriko xedapenak aplikatu behar bazaizkio, ordainsariaren gaineko atxikipenaren ehunekoa kalkulatzeko, artikuluko horietan eta xedapen gehigarri horretan adierazitako integrazio ehunekotik egokitzen dena aplikatuz ateratzen den kopurua zenbatuko da etekintzat.”

“3. Horrela zehaztutako atxikipen ehunekoa ordaindutako ordainsari guztiei aplikatuko zaie. “Ordainsari horietarikoren bati zergaren foru arauaren 19. edo 20. artikuluetako eta hogeita batgarren xedapen gehigarriko xedapenak aplikatu behar bazaizkio, 19. eta 20. artikuluko horietan eta xedapen gehigarri horretan adierazitako ehunekotik egokitzen dena aplikatuz ateratzen den etekinean aplikatuko da ordainsariaren gaineko atxikipenaren ehunekoa.”

Hogeita sei. Aldatu egiten da 84. artikuluko 3. apartatuaren 3. erregelaren bigarren paragrafoa, eta honela idatzita geratzen da:

“Horretarako, zergadunak ordaintzaileari, arautegi honetako 85. artikuluan ezarritako moduan, inguruabar horren berri emango dio, pentsioa zehazten duen ebazpen judizialaren hitzez hitzeko lekukotasun agiria erantsita.”

Hogeita zazpi. Aldatu egiten da 85. artikuluko 1. apartatuaren bigarren paragrafoa eta jarraian hirugarrena sartzen da, eta honela idatzita geratzen dira:

“Era berean, langile aktibo desgaituek zergaren foru arauaren 23. artikuluko 3. apartatuan aipatutako egoera jakinarazi eta egiaztatuko dute.

Halaber, zergaren foru arauaren IV. tituluko VI bis kapituluaren jasotako araubide berezia, leku aldatutako langileentzako, aplikatzeko aukera jakinarazi beharko dute.”

Hogeita zortzi. Aldatu egiten da 99. artikuluko 2. apartatuaren bigarren paragrafoa, eta honela idatzita geratzen da:

“Halaber, ez dira atxikipen oinarrian sartuko langile autonomoen araubide bereziko Gizarte Segurantzako kotizazioen kontzeptuan kooperatibek, arau xedapenak betez, bazkide langileen edo lan bazkideen gizarte eta laguntza estaldurarako ordaintzen dituzten zenbatekoak, ezta Gizarte Segurantzarekin elkarlanean diharduten mutuek aldi baterako ezintasuneko egoeran dauden langile autonomoei dagokienez ordaintzen dituztenak ere.”

Hogeita bederatzi. Ezabatu egiten dira 106 bis eta 107 bis artikulua.

#### AZKEN XEDAPENA

ALHAOn argitaratu eta hurrengo egunean jarriko da indarrean foru dekretu hau.

Vitoria-Gasteiz, 2023ko maiatzaren 9a

*Diputatu nagusia*

**RAMIRO GONZÁLEZ VICENTE**

*Ogasun, Finantza eta Aurrekontu Saileko foru diputatua*

**ITZIAR GONZALO DE ZUAZO**

*Ogasun zuzendaria*

**MARÍA JOSÉ PEREA URTEAGA**